

Լեռնային Ղարաբաղի ինքնավար մարզը¹

1922 թ. հուլիսի 5-ին Հայաստանի կոմկուսի կենտրոնի պլենումը, քննարկելով «Լեռնային Ղարաբաղի դրության մասին» հարցը, ընդունեց հետևյալ որոշումը. հանձնարարել քարտուղարությանը դիմել Անդրերկրում՝ ՌԿ(Բ)Կ կովկասյան բյուրոյի՝ Լեռնային Ղարաբաղին Ադրբեջանի հովանավորության տակ ինքնավարություն տալու որոշումն իրականացնելու խնդրանքով²: 1923թ. հունիսի 27-ին տեղի ունեցավ Անդրերկրկոմի պլենումը, որը, լսելով Անդրերկրկոմի պլենումի 1922թ. օգոստոսի 14-ի որոշմամբ ստեղծված Ղարաբաղի ժամանակավոր կոմիտեի գործունեության մասին Սուրեն Շադունցի և Արմենակ Կարակոզովի զեկուցումները, Ադրբեջանի իշխանություններից պահանջեց մեկամսյա ժամկետում «Լեռնային Ղարաբաղն առանձնացնել իբրև ինքնավար մարզ»³: Ելնելով այդ որոշումից Ադրբեջանի կենտգործկոմը ստիպված էր 1923 թ. հուլիսի 7-ին ընդունել հռչակագիր «Լեռնային Ղարաբաղի ինքնավար մարզի» կազմավորման մասին: Մարզը կազմավորվեց «Լեռնային Ղարաբաղի հայկական հատվածից», որի տերերին, այսինքն՝ հայերին էին պատկանում «բոլոր արտավայրերը, անտառները, այգիները և հողի ու ջրի փաստական տնօրինումը»: Ադրբեջանի իշխանությունը թեև Լեռնային Ղարաբաղին տվեց ինքնավարություն, սակայն բզկտեց հայոց Արցախը. ԼՂԻՄ-ից անջատեց նրա հարթավայրային շրջանը և Աղդամ ավանը՝ ստեղծելով մարզից դուրս շրջան: ԼՂԻՄ-ի լեռնային շրջանի արևմտյան մասը անջատվեց մարզից, և ստեղծվեց «Քուրդստանի գավառ», որով Արցախն անջատվեց մայր Հայաստանից, Արցախից կտրվեց նաև ամբողջ հյուսիսային տարածքը՝ Գյուլիստանն ու Գանձակի հայկական լեռնային մյուս շրջանները⁴:

Այսպիսով՝ 11,5 հազար քառակուսի կմ տարածք և 12 գավառ ունեցող պատմական Արցախից ԼՂԻՄ-ի վարչական տարածքը ամփոփվեց միայն 4,4 հազար քառակուսի կիլոմետրով:

Շուտով Ադրբեջանում որոշեցին Լեռնային Ղարաբաղի ինքնավարության վերաբերյալ հռչակագիրն ինչ-որ կերպ օրինականացնել՝ արցախցիներից կորզելով հավանության և համաձայնության հավաստիք: Ձևակերպվեցին փաստաթղթեր, թե իբրև 1923 թ. օգոստոսին Լեռնային Ղարաբաղում անց է կացվել հանրաքվե, և մարզի բնակչությունը հավանություն է տվել Ադրբեջանի կազմում Լեռնային Ղարաբաղին ինքնավարություն տալու մասին որոշմանը: Մինչդեռ Լեռնային Ղարաբաղում ոչ մի հանրաքվե էլ տեղի չի ունեցել: Այդ հարցը նույնիսկ չի քննարկվել կուսակցական և

¹ Հայոց պատմություն, հատոր IV, գիրք I: Նորագույն ժամանակաշրջան (1918-1945 թթ.), Երևան, 2010, «Զանգակ» հրատարակչություն, ՀՀ ԳԱԱ պատմության ինստիտուտ, էջ 614-618:

² Տե՛ս ՀԱԱ, ֆ.1, ց.2, գ.3, թ.6:

³ Նույն տեղում, ց.3, գ.12, թ.3:

⁴ Տե՛ս Աբրահամյան Հ., Մարտնչող Արցախը, գիրք Ա, 1917-1923, Երևան, 2003, էջ 273:

պետական մարմիններում: Միայն հրավիրվել են համայնքների ներկայացուցիչների անկուսակցական կոնֆերանսներ, որտեղ խոսվել է Լեոնային Ղարաբաղին ինքնավարություն տալու մասին հռչակագրի շուրջ: Եվ դա էլ մարզկոմի քարտուղար Սերո Մանուցյանը Բաքվի պահանջով ձևակերպել է որպես «հանրաքվե»⁵:

1923 թ. նոյեմբերի 6-ին Ստեփանակերտի կուսակցական դպրոցում տեղի ունեցած ԼՂԻՄ խորհուրդների առաջին համագումարը ստեղծեց մարզային խորհուրդ և ընդունեց մի շարք որոշումներ: Ստեղծվեց հանձնաժողով, որը պետք է մշակեր մարզխորհրդի կանոնադրությունը: Վերջինս՝ որպես ԼՂԻՄ սահմանադրություն, մամուլում հրատարակվեց 1924 թ. հուլիսի 6-ին, ըստ որի՝ բացի Շուշի և Ստեփանակերտ քաղաքներից, մարզի մեջ մտցվել էին Շուշիի գավառից՝ 115, Ջիվանշիրի գավառից՝ 52, Կարյազինոյի գավառից՝ 30 գյուղեր և Ղուբաթլուի գավառից՝ Բերգաձորը՝ շրջակա գյուղերով: Սահմանադրության համաձայն՝ 1924թ. նոյեմբերի 26-ին ստեղծվեց ԼՂԻՄ ժողովխորհրդ, որը գործեց մինչև 1929թ.: Արդեն 1925թ. վերջին Լեոնային Ղարաբաղում գործում էին սահմանադրությամբ նախատեսված բոլոր գերատեսչությունները:

Լեոնային Ղարաբաղում խորհրդային կարգերի հաստատման պահին երկրամասի սոցիալ-տնտեսական պայմանները խիստ ծանր էին: Այդտեղ չէր գործում ոչ մի ձեռնարկություն: 1913 թ. համեմատությամբ գյուղատնտեսական մշակաբույսերի ցանքատարածությունները կրճատվել էին 47,8 լծկան անասունների քանակը՝ 24, ձիերինը՝ 50,8, մանր եղջերավոր անասուններինը՝ 35 տոկոսով⁶: Մարզի 225 բնակավայրերում ապրող 27058 տնտեսություններն ունեին ընդամենը 104 648 գլուխ անասուն: Երկրամասի գյուղական բոլոր տնտեսությունների 41 տոկոսը գուրկ էր լծկան անասուններից, իսկ կեսից ավելին՝ հողամշակման գործիքներից: 1921թ. հազիվ ստացվել է 450 հազար փութ հացահատիկ՝ 1913թ. 969 հազար փութի դիմաց: Խաղողի հեկտարի միջին բերքատվությունը չէր անցնում 8 ցենտներից: Վարելահողերի սակավությամբ Լեոնային Ղարաբաղն Անդրկովկասում զբաղեցնում էր վերջին տեղերից մեկը: Սովն ու աղքատությունը տիրում էին ամենուր⁷: Երկրամասում իրագործվող նոր տնտեսական քաղաքականությունը խիստ դանդաղ էր արմատավորվում: Այնուամենայնիվ, այն աստիճանաբար աշխուժացրեց մարզի կյանքը: Հետզհետե վերականգնվում էր տնտեսությունը:

Սակայն մեծ դժվարություններ էին առաջ գալիս արտադրված մթերքների իրացման գործում: Արդեն 1925 թ. ցանքատարածությունները հասան 33 270 դեյատինի, և ստացվեց 852 հազար փութ հացահատիկ, որը կազմում էր նախապատերազմյանի 92,2 տոկոսը: Չորս տարում մարզի այգիների բերքատվությունը բարձրացել էր 2,5 անգամ և հասել նախապատերազմյանի 70,7 տոկոսին: 1921 թվականի համեմատությամբ 1925 թ. կրկնապատկվել էր բոլոր տեսակի անասունների գլխաքանակը:

⁵ Տե՛ս Տե՛ս Աբրահամյան Հ., Մարտնչող Արցախը, գիրք Ա, 1917-1923, Երևան, 2003, էջ 274-275:

⁶ Տե՛ս Լեոնային Ղարաբաղի Հանրապետության պետական արխիվ (ԼՂՀ ՊԱ), ֆ. 23, ց.1, գ.2, թ. 51:

⁷ Տե՛ս Ադրբեջանի պետական արխիվ (ԱՊԱ), ֆ. 410, ց. 1, գ. 90, թ. 3:

Արցախցիները դարեր շարունակ զբաղվել էին խմիչքների, անաձնապես թթի օդու արտադրությամբ: պատերազմից առաջ արցախցիները տալիս էին Անդրկովկասում արտադրով խմիչքների 7-8 տոկոսը: 1922 թ. երկրամասում արտադրված սպիրտը կազմել է նախապատերազմյան մակարդակի 45 տոկոսը⁸: Արդեն 1925թ. երկրամասում արտադրվում է 3 109 621 աստիճան սպիրտ⁹, որը գրեթե հավասար էր նախապատերազմյան մակարդակին: Մարզում սպիրտի հետագա զարգացումն ընդլայնելու համար 1925 թ. Ասկերանում կառուցվեց օղեթորման գործարան, որի օրական արտադրողականությունը հասնում էր 10 հազար աստիճան առաջին կարգի սպիրտի: Սպիրտի արտադրությունը զարգացնելու լավագույն հնարավորություններ կային Արցախի Վարանդայի գավառում: Այդտեղ կարող էին տարեկան արտադրել մինչև 2,5 միլիոն աստիճան սպիրտ: Անհրաժեշտություն զգացվեց օղեթորման երկրորդ գարծարանի, որը կառուցվեց Վարանդայի Քյոնդալյան գետի ձախ ափին 1926-1927թթ.: Այդ գործում մեծ օգնություն ցույց տվեց Խորհրդային Հայաստանի կառավարությունը: 1927 թ. հոկտեմբերի 1-ին ստեղծվեց Լեռնային Ղարաբաղի գինու և սպիրտի տրեստը՝ Ղարգինտրեստը, որին հանձնվեցին տվյալ երկու գործարանները¹⁰:

1921 թ. սկսած՝ աշխատանքներ էին կատարվում մետաքսագործական ֆաբրիկաները վերականգնելու ուղղությամբ: Մետաքսագործությունը Արցախում գոյություն ուներ դեռևս հնուց: 1913 թ. այդտեղ կար 46 ֆաբրիկա, որոնցից 1922թ. գործում էր հինգը: Մետաքսի ֆաբրիկաները վերականգնելու և 40-50 տարվա հաստոցները նորերով փոխարինելու համար 1925 թ. ներդրվեց 188 հազար ռուբլի¹¹: Մետաքսագործության՝ որպես մարզի արդյունաբերության հիմնական ճյուղի վերականգնումն ու զարգացումը հարկադրեցին ստեղծել տնտեսական համակարգող մարմին: Մարզխորհրդի գործադիր կոմիտեն որոշեց կազմակերպել մետաքսի տրեստ¹², որն իր գործունեությունը սկսեց 1926 թ. հունվարի 1-ից: Տրեստի իրավասությանն անցան մարզի տարածքում գործող պետական բոլոր մետաքսագործական ձեռնարկությունները: Նորաստեղծ տրեստը նյութական կարևոր օժանդակություն ստացավ մետաքսի միութենական տրեստից, որի օգնությամբ 1925/26 տնտեսական տարում շահագործման հանձնվեց 3 ֆաբրիկա¹³: Արդեն 1927/28 տնտեսական տարում մարզում աշխատում էին 13 ֆաբրիկաներ, որոնք այդ տարում արտադրեցին 36 672 կգ մետաքսահումք:

Լեռնային Ղարաբաղի տնտեսության վերականգնման տարիներին դեռևս անօգտագործելի էին մնում անտառները, որոնք կազմում էին մարզի տարածքի մեկ երրորդը: Հաճարենիներով ու կաղնիներով հարուստ անտառներն օգտագործելու համար չկար փայտամշակման որևէ գործարան: Մարզի տարածքում դրանք

⁸ Տե՛ս ԼՂՀ ՊԱ, ֆ. 11, ց. 1, գ. 18, թ. 58:

⁹ Տե՛ս նույն տեղում:

¹⁰ Տե՛ս նույն տեղում, ֆ. 33, ց. 1, գ. 45ա, թ. 5:

¹¹ Տե՛ս նույն տեղում, ֆ. 11, ց. 1, գ. 48, թ. 11:

¹² Տե՛ս Խորհրդային Ղարաբաղ, 31 օգոստոսի, 1924:

¹³ Տե՛ս ԼՂՀ ՊԱ, ֆ. 1, ց. 1, գ. 48, թ. 6:

հիմնվեցին 1924 թ.: Մեկ տարի անց մարզի անտառներից ստացվել էր 58 309 ռուբլու գուտ եկամուտ:

Առաջածորի ջրաղացաքարերի արտադրությունը հայտնի է շատ վաղուց: Արտադրանքի այդ տեսակն Անդրկովկասում եզակի էր: Արցախից ջրաղացաքարեր էին արտահանում Կովկասի տարբեր շրջաններ, Ռուսաստան, Միջին Ասիա և Մերձավոր Արևելքի երկրներ: 1923 թ. վերականգնվեց ավերված հանքը և հանձնվեց մարզային ժողտնտխորհին: Կարճ ժամանակամիջոցում կրկնապատկվեց արտադրությունը:

Ժողովրդական տնտեսության վերականգնման տարիներին մարզում հիմնական շեշտը դրվում էր հատկապես գյուղատնտեսության վերականգնման և նրա հետագա զարգացման վրա: Դրանում կարևոր դեր խաղաց գյուղատնտեսական ընկերությունների ստեղծումը: 1924 թ. երկրորդ կեսից սկսած՝ Լեռնային Ղարաբաղում կազմակերպվեցին հողի մշակման մեքենայական, վարկային, ջրային և այլ ընկերություններ: Սկսած 1923 թ.՝ կազմակերպվել էին մի շարք ագրոկետեր, որոնք գյուղական տնտեսություններին օգնում էին արմատավորելու հողամշակման առաջավոր փորձը: Միջոցառումներ ձեռնարկվեցին վերականգնելու ռոտգման համակարգը: 1924 թ. մարզում գործում էր 61 քյարիիզ (Ղարաբաղում ստորգետնյա ջրերը ինքնահոս դուրս բերելու կառույց), որոնք օգտագործվում էին նաև ռոտգման համար:

Մարզում համեմատաբար արագ էր վերականգնվում անասնապահությունը: 1925 թ. Լիսագորում՝ թթու ջրի տեղամասում, որը գտնվում է ծովի մակերևույթից 1800մ բարձրության վրա, կազմակերպվեց անասնապահական ֆերմա, որի նպատակը արոտավայրերի և մշակաբույսերի օգտագործման ձևերն ուսումնասիրելն էր¹⁴:

Լեռնային Ղարաբաղում հանդես եկան առաջին վարկային ընկերությունները և կոոպերացիայի մի շարք ձևեր: Արագորեն էր զարգանում հատկապես սպառողական կոոպերացիան: Առևտրական կետերի թվաքանակը մարզում 1925 թ. հասել էր 283-ի: Այստեղ կատարվող ամբողջ առևտրի 60 տոկոսը բաժին էր ընկնում պետական և կոոպերատիվ առևտրական կետերին¹⁵:

Տնտեսության վերականգնումն ավարտվեց 1928 թ.: Հետագա տարիներին հետևողականորեն զարգանում էին արդյունաբերությունն ու գյուղատնտեսությունը, և վերելք էր ապրում մշակույթը: Արդյունաբերական բնագավառում խմիչքների և մետաքսի արտադրությունը և այլ ոլորտներ ընդլայնում էին իրենց ծավալը: 1929 թ., երբ լուծարվեցին Բաքվում գտնվող Խորհրդային Հայաստանի առևտրական հիմնարկները, նրա բոլոր առևտրական կետերն ու պահեստները տրվեցին Ղարաբաղին: 1931 թ. սկսած՝ Ասկերանի օղեթորման գործարանն արտադրում էր կոնյակի հումք: Արդեն շրջանառությունը կազմում էր 9,8 միլիոն ռուբլի: Ղարաբաղի տրեստը մեծ դեր կատարեց մարզում խաղողագործության, թթաբուծության և շերամապահության զարգացման գործում: Ղարաբաղի տրեստը, որը 1933 թ. հունվարի 1-ից վերանվանվեց Ղարաբաղի

¹⁴ Տե՛ս ԱՊԱ, ֆ. 411, ց. 1, գ. 1, թ. 31:

¹⁵ Տե՛ս ԼՂՀ ՊԱ, ֆ. 33, ց. 2, գ. 47, թ. 23:

գինու և սովխոզների տրեստ, ավելի ընդարձակեց իր գործունեության շրջանակները և արդեն 1940 թ. արտադրեց 105,2 հազար դեկալիտր գինի, 1,2 հազար դեկալիտր կոնյակ և այլ խմիչքներ¹⁶:

Մարզում մետաքսարդյունաբերության զարգացման նպատակով 1927 թ. Ստեփանակերտում սկսվեց մետաքսագործական նոր ֆաբրիկայի շինարարությունը, որի առաջին մասնաշենքը շահագործման հանձնվեց 1929 թ.: Այն սարքավորվել էր իտալական ութբռնիչավոր «Բատալիա» համակարգի 96 հաստոցներով: Մարզում մետաքսարդյունաբերությունը նորանոր հաջողությունների հասավ 1930-ական թթ., երբ մասամբ լուծվեց սեփական հումքի՝ բոժոժի արտադրության հարցը: 1934թ. մետաքսի տրեստը վերանվանվեց Ղարաբաղի մետաքսի արդյունաբերության վարչության: Ստախանովյան շարժումը լայնորեն ծավալվում էր նրա բոլոր ձեռնարկություններում, որոնց արտադրանքը 1940 թ. հասել էր 98,1 տոննա մետաքսահումքի և 25,9 տոննա ոլորաթելի¹⁷:

ԼՂԽ արդյունաբերության զարգացման գործում կարևոր նշանակություն ուներ էներգետիկական բազայի ապահովման խնդիրը: 1913 թ. Արցախում արտադրվել է 0,08 միլիոն կվտ էլեկտրաէներգիա, որը 1928 թ. հասել էր 0,29 միլիոնի: Էլեկտրաէներգիայի պակաս արտադրության ճեղքվածքը վերացնելու նպատակով Կարկառ գետի վրա կառուցվեց 255 կվտ հզորությամբ էլեկտրակայան, որը շահագործման հանձնվեց 1930 թ.:

Նախապատերազմյան հնգամյակի տարիներին կառուցվեցին Ստեփանակերտի փայտամշակման և մեխանիկական արհեստանոցները, լիովին վերակառուցվեց ջրաղացաքարերի արտադրությունը, կառուցվեցին տասնյակ տնայնագործական ձեռնարկություններ: Զարգացավ գյուղատնտեսությունը, լուծվեց հողաշինարարության հարցը: Հողագործությանն օգնություն էին ցույց տալիս նորաստեղծ մեքենայական ընկերությունները և տրակտորային շարասյուները: 1926 թ. մարզի գյուղական տնտեսությունների 55 տոկոսն ընդգրկված էր տարբեր կոոպերատիվներում¹⁸: Մարզում գյուղատնտեսության վերականգնման գործում դեր ունեին կատարելու կոլտնտեսությունները: 1927 թ. վերջին մարզում կար 13, իսկ 1928 թ. վերջին՝ 27 կոլտնտեսություն¹⁹: Մարզում դրանց կազմակերպումը նոր թափ առավ 1929 թ. վերջին: Այնուամենայնիվ, այդտեղ ևս խախտվեց կոլտնտեսություն մտնելու կամավորության սկզբունքը, և հրահանգվեց արհեստական շտապողականություն: Մարզի կուսակցական և պետական մարմինները, օգտագործելով հարկադրանքի մեթոդը, ժամ առ ժամ ուռճացնում էին կոլեկտիվացման թվերը: Այսպես՝ եթե 1930 թ. հունվարի 25-ի դրությամբ մարզում կոլեկտիվացվել էր գյուղական տնտեսությունների 23 տոկոսը, ապա փետրվարի կեսերին այդ ցուցանիշը հասել էր ավելի քան 35

¹⁶ Տե՛ս և Достижения Советского Нагорного Карабаха за 40 лет в цифрах, Степанакерт, 1963, էջ 22:

¹⁷ Տե՛ս նույն տեղում, էջ 19-20:

¹⁸ Տե՛ս Խորհրդային Ղարաբաղ, 3 հուլիսի, 1926:

¹⁹ Տե՛ս ԼՂՀ ՊԱ, ֆ. 23, ց. 1, գ. 179, թ. 169:

տոկոսի²⁰: Լեռնային Ղարաբաղում ևս կոլտնտեսային շարժման ծավալման ընթացքում թույլ տրված սխալների հետևանքով գյուղում արհեստական կերպով ուժեղացվեց դասակարգային պայքարը («Բանդիտական շարժում»): 1930 թ. մարտի 10-ի դրությամբ կոլեկտիվացման էր ենթարկվել մարզի գյուղական տնտեսությունների 63 տոկոսը, իսկ մի փոքր անց՝ 73,3 տոկոսը²¹: Այդտեղ ևս ձեռնարկվեցին միջոցառումներ, որոնք նպաստեցին կոլեկտիվացման ընթացքում թույլ տրված սխալները շտկելուն: Արդեն 1932 թ. վերջին մարզի 210 կոլտնտեսություններում ընդգրկված էր գյուղական տնտեսությունների 46 տոկոսը: Հաջորդ տարիներին կազմակերպվեցին մի շարք պետական տնտեսություններ, ստեղծվեցին անասնապահական ֆերմաներ: 1940 թ. մարզում կոլեկտիվացվել էր գյուղական տնտեսությունների 99 տոկոսը:

1920-1930-ական թթ. մարզի մշակութային կյանքը թեև դանդաղ, բայց զարգանում էր: Արդեն երկրորդ հնգամյակի վերջին մարզի 200 դպրոցներում սովորում էին 36 996 երեխաներ: Գործում էին բազմաթիվ ակումբներ, գրադարաններ, թատրոն, երևան եկան մարզական կառույցներ և այլն:

Այնուհանդերձ, Ադրբեջանի ազգային իրականության քաղաքականությունը, որն առավել ակնհայտ էր արցախահայության նկատմամբ, կտրվածությունը Խորհրդային Հայաստանից, լրջորեն խոչընդոտում էին ԼՂԻՄ-ի սոցիալ- տնտեսական և ազգային- մշակութային զարգացմանը:

²⁰ Տե՛ս Խորհրդային Ղարաբաղ, 15 փետրվարի, 1930:

²¹ Տե՛ս ԼՂՀ ՊԱ, ֆ. 18, ց. 1, գ. 130, թ. 48: